

[Augsburg], 9. Februar 1569

An Johannes Crato von Kraffttheim

UB Breslau, Ms. 9820 (Rehdigeriana 246), Nr. 337 (fol. 448r-v).

Clarissimo viro, D. Ioanni Cratoni à Crafftheim, Caesareo archiatro, sacri palatij Comiti. Domino et patrono suo colendo. Wien.

S. Liberalitas tua, Clarissime vir, domine et patrone colende, gratissima est. Sed cum ea vti non possim, nisi longiquo sumptuosque itinere suscepto, et in publica pompa, à qua natura abhorreo, οὐ μουσικὸς ὃν ἐν πολλοῖς λέγειν: malo priuatum delitescere, quam publicè ridiculus fieri: praesertim, cum seruitutem seruiam, à qua diutius sine indignatione dominorum abesse mihi non licet. Iter in Thermas et Basiliense (quod mense Aprili demum ingredi cogito) menses duos auferet. Quibus si accederet iter Viennense: triens totius anni magistratui meo periret, alioqui non maximi facienti vel me vel operas meas. Philosophia me τὴν κενοδοξίην contemnere docuit: necessitates corporis et fortunae vices monent, vt etiam ad popularem opinionem me accomodem, quantum rectè et commodè facere possum: Sed fortunam vrgere inuitam et repugnantem, exacta iam aetate, non est consilium. Deo opt[imo] Max[imo] curae erit, vt etiam hinc electus, nidulum aliquem inueniam, in quo acquiescam. Δειλὴ ἐπὶ πυθμένι φειδὼ. Ante annos 30 de huiusmodi aliqua ratione cogitandum fuisse, si sapuisse. Etsi quid tum quoque profecissem? Vna salus seruire Deo: sunt caetera fraudes. Omnia praetereunt praeter amare Deum. Paedagogum E. T.<sup>ae</sup> idoneum profectò nullum scio. Est adolescentia huius vrbis ita corrupta, vt animus penè in pedes mihi decidat de ea cogitanti. quid cogitanti dico? cum coràm quotidie intueri coger negligentiam, petulantiam, arrogantiam, contumaciam multorum. Literas heri Basilea ad me missas, mitto: per eundem tabellarium tuas ad Zwingerum missurus. Qui quidem causam meam typographicam ita agit, vt illorum hominum tergiuersationes meam praesentiam flagitare videantur. Sed quicquid egero: ante redditum illorum è Nondinis cum me nihil profecturum esse intelligam, malo domi cum Demosthene, quam in Hercynia sylua cum procellis niuum collectari. Vale. 9. Februarij 1569.

Hiero[nymus] Wolfius  
Tuus.